

## **Yetsi nu berupa udhelha Pabluha ge ka benne ria leke Jesucristuha se'eke lhe'esi Tesalónica**

<sup>1</sup> Neti Pablo, lenia Timoteo-ni lhe Silvano-ni lhe, ridhelhatu yetsi-ni gele. Ridhelhatu na len lebi'i ka benne ritupale lhe'esi Tesalónica-na de ankale ge Xxudiri'i do yebáha lhe ge Jesucristu benne anke Xxanari'iha lhe.

<sup>2</sup> Lake edá leke aka lenke le lhe use'eke le xen su lasi lhe.

*Pabluha rinnabe len Tata Do Yebáha ki aka lenie ka benne se'e Tesalónica-ni*

<sup>3</sup> Xa betsi to, ri'itu satíaba daa lotu ugwetu Tata Do Yebáha ixkixaru gele, kumu aná dika uintu, kumu lebi'i chi diale ria tsitsiru lele ge Jesús-ni, lhe anágaba nna kua ttu ttule chirugaba diale raka chiettiruin ge luesile.

<sup>4</sup> Laxkala ri'itu rebanaba letu gele arlo adí ka benne chi ria leke Tata Do Yebáha, kumu de lebi'i chi ria tsitsi lele gebie lhe de rutto ruchíale meskiba bika ridú nookana le lhe meskiba bika ruyúle elha disa lhe.

<sup>5</sup> Nu ratele-na runna liina deki Tata Do Yebáha ruinbe attiba ankaba geni. Rugwelhabe ratele aná kini anáchu nna akale nu dika innabia Tata Do Yebáha, kumu delo ni'a ge nuná nna ratele aná.

<sup>6</sup> Tata Do Yebáha, nu dika ixúba nuha unie atti ugwebie elha disa ka nu rudhaka xiikana le.

<sup>7</sup> Lebi'i ka nu rudhaka xiikana nna kuabe elha disa gele, attigaba unie len ri'itu ganna chi uka xxe Jesús benne anke Xxanari'iha, dedábie yebáha lenbie ka anjeli geeha, delába ka anjeli ra tsitsi lekeha.

<sup>8</sup> Dedábie lhe'e belha ge giha, kini ugwebie elha disa ka nu abittu ria lekani Tata Do Yebáha, lhe abittugaba bedokana tisa ge nu ra ka tisa ge Jesús benne anke Xxanari'iha lhe.

<sup>9</sup> Ka nuná ttu dia liiba tsiakana ata tse'e lookana, iru'unabakana idittu, labí esinkana arlo Jesús-ni lhe labí esinkana lhe'e xiani geeha lhe, delába xiani geeha nu ra tsitsi leniha.

<sup>10</sup> Iyá nuní aka la sá atti esieha, kini anáchu nna iyába ka benne chi ulesie ki akake gebie, delába ka benne chi ria leke gebie, ka benneha nuha uinke kini inná xxeni lebie lhe ebanakanie gebie lhe. Anágaba lebi'i selagabale len ka benneha, kumu de gwa ugiagaba lele ge nu chi utixxi'entu leha.

<sup>11</sup> De nuha nna satíaba rinnabatu gele len Tata Do Yebáha, kumu labie uxie le lo neda geeha, kini de ra tsitsi lebie nna aka lenie le, kini anáchu dhaale uinle iyába nu tse raka lele de chi ria lele gebie.

<sup>12</sup> Aníha kini de lebi'i nna inná xxeni le Jesús benne anke Xxanari'iha, lhe anágaba lebi'i, de benneha nna inná xxeni lele, kumu aníha redá lebie runie, lhe aníha-gaba redá le Tata Do Yebaa geri'iha runie lhe.

## 2

*Pabluha rigixxi'abie gasina uin nubiyú ruin*

*satsaha ganna chi bisiana*

<sup>1</sup> Nnanna xa betsi to, raka letu kixxi'entu le ge la sáha atti chi esia Jesucristu benne anke Xxanari'iha, delába atti etupari'i eti'ari'e gwetsáha. Rinnabatu len lebi'i,

<sup>2</sup> bittu ttu nnelaba otsea elha rulaba le gele, lhe bittu gasinle ganna chi iyieninle innákana: "Aní ra Espíritu ge Tata Do Yebáha, chiba bisia sá esia benne anke Xxanari'iha" o sila innákana: "Aní chi biyienintu ra ka benne", lhe o innákana: "Aní ra lo yetsi udhelha ka Pabluha." Ka nu inná aníha, ukadiba innákana deki ri'ibatu udhelhatu yetsiha.

<sup>3</sup> Ka nuha, ttu tsa bittu tsia lele gekani, kumu benneha labí esiaxxie axtaliba ganna chi iria ka nu ese'e disakana lo Tata Do Yebáha, la'anialiba nna tti aka xxe nubiyú ruin satsaha, delába nu tsiana ata tse'e loonaha. Iki deliba nuha nna tti esia benne anke Xxanari'iha.

<sup>4</sup> Nubiyú ruin satsaha, edú disana lhe uinna deki lana ra xxeniru leni arlo iyába ka nu tee lákani diosi, lhe arlo iyába ka nu ruin ka benne le'a gekani lhe. Axtaba lhe'e yotu ge Tata Do Yebáha ga'anna dhona nna uinna deki labana nuha ankana Tata Do Yebáha.

<sup>5</sup> Lebi'i gwa rexxaba lele attili sa doa len lebi'iha, gwa utixxi'abania le ge iyá nuní.

<sup>6</sup> Nnanna chigaba yule bí nuha rukwedana nubiyú ruin satsaha kini abittu isiaxxina, kumu gannaliba chi gwadona la sá isianaha, la'anialiba nna isiana.

<sup>7</sup> Kumu nu satsaha, sigába chi udulo nuha rakana. Nnanna nna sun tteba riyasa itua nu rukwedana nubiyú ruin satsaha,

<sup>8</sup> iki deliba nuha nna tti aka xxena. Lana nuha utse'e loo Jesús benne anke Xxanari'iha na, sunruba len be iria ro'eha, lhe anágaba sun tteruba len xiani geeha utse'e looe na ganna chi besieha.

<sup>9</sup> Nubiyú ruin satsaha isiana ule'ena nu xxeni ra le nu xxegwiha, delo tisaba uinna ka milagru lhe adíru ka nu dika ebaninri'i geni lhe.

<sup>10</sup> Len iyá nu satsa uinnaha dhi yiena ka nu tsia nnittikana arlo Tata Do Yebáha. Lakana nuha labí begwekana lidhaka tisa nu anka gwalíha, labí benkana ki odilá Tata Do Yebáha kana.

<sup>11</sup> De nuha nna rugwelhabe kana kini rixú yiekana ria lekani ge gwen lasiha.

<sup>12</sup> Aníha kini ibixxi iginni iyába ka nu abittu ugía lekani ge nu anka gwalíha, sinuki uyu'urula lekani benkana nu satsaha.

### *Tsitsi gwaltse'e lo neda ge Tata Do Yebáha*

<sup>13</sup> Ttaka lebi'i xa betsi to, ka benne rakani Tata Do Yebáha gele, ri'itu satíaba teeki ugwetue ixkixaru gele. Ugwetue ixkixaru, kumu ttili sisi'a tteha chi bekwebie le ki odilábie le, kumu Espíritu geeha ulesie le kini akale gebie lhe anágaba kumu de gwa ugíaba lele ge nu anka gwalí.

<sup>14</sup> Tata Do Yebáha nuha uxie le tti biyieninle ka tisa tse utixxi'entu leha, kini anáchu nna inná xxeni lele attiba ra xxeni le Jesucristu benne anke Xxanari'iha.

<sup>15</sup> Laxkala xa betsi to, gwaltse'e tsitsi lo neda gebie lhe bittu ixulhinle a udole tisa ge nu chi bele'entu leha, sila nu bele'entu le len tisa ro'otu, lhe sila nu utixxi'entu le lo yetsi lhe.

<sup>16</sup> Xxudiri'i do yebáha bedá lebie ukanie geri'i dhe ttu tsaba uleki tsitsie leri'i dhe, anágaba runie kini ruxxen leri'i deki gwadíbari'i nu tse utebie.

<sup>17</sup> Labie dhe kwinaba Jesucristu benne anke Xxanari'iha udú ittake lele, dhe anágaba use'e tsitsike le kini anáchu nna uinle dhe innele iyá nu anka tse dhe.

### 3

*Pabluha rinnabe len ka benne ki innabake gebie len Tata Do Yebáha*

<sup>1</sup> Nnanna xa betsi to, rinnabaa len lebi'i, innabale getu len Tata Do Yebáha kini yuba chadhi ka tisa rigixxi'atu-ni, delába ka tisa ge Jesucristu benne anke Xxanari'iha, dhe innabagabale lenie kini ka benne ugweke lidhaka ka tisa-ni, attiba lebi'i chi begwele lidhakake.

<sup>2</sup> Innabagabale lenie kini odilábie ri'itu lo ná ka nu re satsa lekani dhe lo ná ka nu ruin satsa dhe, kumu lebi'i gwa yu xeabale labí iyá ka benne chi ria leke ka tisa-ni.

<sup>3</sup> Ttaka Jesús benne anke Xxanari'iha labí runnitti tisa gebie. Benneha guse'e tsitsibe le dhe godilábe le lo ná nu xxegwiha dhe.

<sup>4</sup> Ruxxen letu gebie deki lebi'i, attiba chi diale rudole tisa ge nu chi bodha'antu uinle, anába sa tsiale uinle.

<sup>5</sup> Benneha gwakaba lenie le ki akale benne si'i lasi attiba Tata Do Yebáha anke benne si'i lasi, dhe uingabe kini lebi'i utto uchíale attiba labie betto bechíabie lo nu gwateeha.

*Pabluha rabie: "Teeki kwenri'i sina"*

<sup>6</sup> Betsi to kia, Jesucristu benne anke Xxanari'iha rutebie lo neda getu ki ratu le: “Gwaluk-witta kwe'e ka nu chi ria lekani Jesucristuha, delába ka nu anakana nu lea, bittuba raka lekani bixa uinkana, lhe nigaba a ruinkana nu chi bedhetintu leha.”

<sup>7</sup> Lebi'i chiba yule gasina uinle ki taxxína tti tte ruintu, kumu ri'itu tti use'etu len lebi'iha labí ukatu benne lea.

<sup>8</sup> Labí kwentaba utotu yetta gele, sinuki betú besába letu urentu sina rela lhe resá lhe. Aníha bentu kini abittu unnabatu lenle nu biyasintu.

<sup>9</sup> Laa innágari'i deki labí uka getu innabatu len lebi'i ki ugole ri'itu. ¡Ko'o! Gwa ukaba getu, deba nna labí uka letu innabatu lenle, kumu de raka letu ule'entu le gasina anka elha ruin getu, kini aníha-gaba lebi'i nna uinle atti tte ruintu.

<sup>10</sup> Tti sa se'etu len lebi'iha bodha'angabatu ratu le: “Ttu nu abittuba raka leni kwenna sina, abittugaba gona.”

<sup>11</sup> Ratu aní kumu chi binatu ge ttu chupale bittiba ruinle rekile, labí bixa sina ruinle, sun tteruba rekile ruga'a ro'ole ata labí ralhale inele.

<sup>12</sup> Jesucristu benne anke Xxanari'iha rutebie lo neda getu ki rulisatu le. Lebi'i ka nu ruinle aná gwalikwen sina ki aka gole nna abitturu utsetsinle adí ka benne.

<sup>13</sup> Adíle nna xa betsí to, abittu udhanle uinle nu anka tse.

<sup>14</sup> Ganna nuxa benne abittu udoe tisa ge nu ratu lo yetsi-ni, benneha gwaludo xubenále ge nu runie nna abitturu utsálee. Aníha kini ettunie.

<sup>15</sup> Deba nna bittu ise'enle lenie, latsiruba gwalulise, len tisa besiba gwalikise, gwalulise atti galába rulisari'i ttu betsi to geri'i.

*Pabluha rulhuxe rinnebie*

<sup>16</sup> Jesucristu benne anke Xxanari'iha, benneha ruse'ebie ri'i latsiru. Kwinaba labie, meskiba bixa satele nna satiaba use'ebie le xen su lasi, lhe akagaba lenie iyá ttele lhe.

<sup>17</sup> Padiuxi ridhelhaa gele lo yetsi-ni. Kwinaga neti Pablo runia nuní len letra kia, kumu aníba labiti runia xani'a iyába ka yetsi ridhelhaa. Aníba runia letra kia.

<sup>18</sup> Jesucristu benne anke Xxanari'iha edá lebie aka lenie iyá ttele. Amén.

**Ka Tisa ge Tata Jesucristuha  
Zapoteco, Santa Ana Yareni: Ka Tisa ge Tata  
Jesucristuha New Testament**

copyright © 2014 Wycliffe Bible Translators, Inc.

Language: Zapotec, Yareni

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 28 Dec 2024 from source  
files dated 29 Jan 2022

1fa271cb-de62-58fc-97c6-e1d0fa68b33d